

## Predigt öku Gottesdienst zur Einheit 2019 - Mundart

Einleitung Lesung:

Ich lise us dä Bible Vers us äm 1. Königebuch.

Da gahts um dä Salomo, Sohn vom grosse König David.

Dä Salomo isch Nachfolger vom David worde.

Und da isch ja d'Frag, was bruchts, dass mer än guete König isch.

Gott isch äm Salomo im Traum erschine:

und dä Salomo hät vo Gott dörfe bitte, was er will.

Dä Salomo hät um äs Herz, wo cha lose bittet,  
so dass er Grächtigkeit i sis Volk cha bringe.

Die Bitt isch äm Salomo erfüllt worde.

Und so verzellt d'Bible vo zwei Fraue,

wo vo ihm ä grächts Urteil erhoffed.

Jedi hät äs Chind gebore, eis isch gstorbe

und jetzt behauptet jedi, dass es ihres isch:

Mir losed uf Wort us 1. König, Vers 23 - 28

➤ 23 - 28

Der Gerechtigkeit und nur der Gerechtigkeit sollst du nachjagen,  
damit du am Leben bleibst. Dtn 16,20

Liebi Gmeind

Der Gerechtigkeit und nur der Gerechtigkeit sollst du nachjagen.

Die Wort stöhd im füfte Buech Mose, im Vers 20.

Die ökumenisch Gmeinschaft hät die Wort usgwählt,

dass d'Ökumene weltwiit dadrüber naadänke söll.

Gönd uf d'Jagd nach Gerechtigkeit

Ich bin bim Wort Jagd hangeblibä. Das Wort gfallt mir und ich muess a  
üsen Hund danke.

Das isch nämli än Jagdhund.

Er und siner Gattig sind derzue züchtet worde, dass mer sie chan  
losschicke.

Losschicke, dass sie dur dä Wald renned bis sie ä Spur findet und Wild  
entdecked.

Losschicke, will sie besser und schnäller äm Wild chönd nahjage.

Söttig losgschickti Hünd müend sälbständig handle.

Für das sind sie züchtet und trainiert worde.

Gönd uf d'Jagd nach Gerechtigkeit

Hüt werdet aber die meischte Hünd nüme uf d'Jagd gschickt.

Im Gägeteil – die anezüchtete Instinkt und Fähigkeite werde dä Hünd hüt vo Hundehalterinne und Hundehalter oft mühsam abtrainiert und underdruckt.

Mer wet nöd än Hund, wo jagt.

Es söll nöd si, dass än Hund allei dur dä Wald rennt, Wild ufstöberet und allefalls au no bluetig bisst.

Dem seit mer dänn au nüme jage, sondern wildere.

Chunt das doch vor, dänn schickt mer dä Jäger los und dä jagendi Hund wird sälber zum gjagte Tier.

Gönd uf d'Jagd nach Gerechtigkeit

Isch d'Jagd dä Wäg um Grächtigkeit z'finde?

Jage

öpper, wo losschickt.

öpper, wo gschickt wird.

öpper, wo ufgstöbered wird.

Ich danke da an än Maa, wo inerä Notschlafstell übernachtet hät.

Sin Fall isch dä Händ vo dä Kesp überantwortet worde.

Dere Behörde übergäh, wo üsri Gsellschaft losschickt, um sich um sociali Notfäll i Familine z'kümmere, professionell, staatlich legitimiert.

Dä Ma verzellt: Er und sini Frau händ Striit gha – lut und heftig.

S'erscht Mal. D'Polizei isch cho.

Er hät müesse us dä Wohnig furt, weg vo Frau und Baby.

Er verstaht d'Wält nüme. Sis Chind hät Geburtstag und er dörf's nöd gseh.

Er verzellt vo Papier, wo ihm zuegschickt werdet, vome vorläufige Verbot sini Frau und sis Chind gseh,

vo zuesätzliche Chöchschte

und dä Not nienets än Platz zum Schlafe z'ha.

Glichwohl isch äs so,

dass s'niemert guet findt ä Familie usenandzrisse, au Kesb nöd,

Niemert finds guet finanzielli Not z'vergrössere, au Sozialämter nöd.

Niemert finds guet öpper uf d'Strass zstelle, au die nöd, wo usgschickt werded.

Zu andere Ziite, a andere Ort wäri das vielleicht na anders greglet worde.  
Ä Dorfmeinschaft hät sich um die Familie kümmeret,  
und dänn au z'viel iigmischt.  
Öpper hät ä vorübergehendi Übernachtigsmöglichkeit aabote  
und dänn meh mitgredt, als vertreit wird.  
Öpper ander hät s' Chind ghüetet, dass d'Eltere i Rueh mitenand chönd  
rede und gliichziitig grad au na än hufe Erziehigstips erteilt.  
Und dä Dorfvermittler wär grüeft worde,  
vielleicht sogar än Pfarrer, obwohl mer mit äm Glaube eh sini Müeh hät.  
Ä Gmeinschaft hät sich kümmeret,  
zwar nöd professionell,  
nöd staatlich legitimiert,  
aber nöch und bekannt mit dä Familie, mängsmal au zu nöch.

Gönd uf d'Jagd nach Grechtigkeit  
Einigi vo üs chönd sich vielleicht guet i die Situation inefühle.  
Sie händ scho erläbt,  
wie us grechte Absichte nöd direkt Grächtigkeit entsteht.  
So dass mer d'Welt nüm verstaht.

Vielleicht will sie vo einere Instanz zur andere gschickt worde sind.  
Vielleicht will sie erfahre händ, wie ihri Situation  
nach ganz andere Kriterie als ihrne eigne aagluet  
und entfremdet beurteilt worde isch.  
Vielleicht will sie selber losgschickt worde sind i Situatione  
und Befehl händ müesse usführe  
und Regle befolge  
und doch gseh händ,  
dass das nöd zu meh Grechtigkeit gfühert hät.

Gönd uf d'Jagd nach Grechtigkeit  
Mir händs i dä Läsig ghört.  
Au dä König Salomo hät anderi losgschickt.  
Nöd, dass sie a sinerä Stell für ihn d'Sach zwüsched dä zwei Frau reglet.  
Är hät d'Afrag nöd andere überantwortet.  
Er hät anderi gschickt und gseit: Holed mir äs Schwert.  
S'Trennende, d'Gwalt i dem Konflikt hät er dermit vor Auge gfuehrt.  
Das isch dä Wäg gsi, wie Muetter und Chind zäme blibä sind.  
Sälber isch er i dä Situation blibä,  
hät glosed, was die Fraue vorbracht händ.  
I sinere Rolle als König isch er zmitzt im Konflikt drin blibä.

Gönd uf d'Jagd nach Gerechtigkeit  
Und jetzt, wie handled mir, losgschickt Gerechtigkeit z'jage?  
Mir alli sind derfür, dass Mäsche grecht behandelt werdet  
und Ungerechtigkeit bekämpft wird.  
Daderbi chönd mir uf än Rechtsstaat zäle,  
wo alli gliich behandelt  
und Gsetz für alli gliich gältet.  
Mitenand bestimmed mir demokratisch  
immer wieder ufs neue, wie Gsetz sölled sie.  
Trotzdem –  
Da chunt än aleinerziehendi Muetter ä Arbet nöd über,  
wo sie doch beschtens qualifiziert wär derfür.  
I ihrne Akte stah, dass sie scho Betriebigä gah hät.  
Die Stell wär d'Chance ihre Schuldeberg z'verchlinerä.  
Sie erläbt wie gwaltig Fehler us dä Vergangeheit sie verfolgt.

Da investiered mir i grüeni Energii und fördered Elektroauto.  
D'Batterie wos derzue brucht, sind mit Lithium hergestellt.  
Dass mer zu dem wertvolle Material chunt,  
werdet täglich Millione Liter Grundwasser ufepumpt,  
wo i dä Wüeschti verdunschtet.

Mir sind betroffe, wie gwaltig mer sich cha tüsche –  
mer wott Guets tue  
und ame andere Ort chunts trotzdem übel use  
oder s'fühert sogar zu Ungrächtigkeit.

Gönd uf d'Jagd nach Gerechtigkeit  
Ich han ä persönlichi These,  
Ich danke, dass mir mängsmal grad det,  
wo mir üs mit grossem lisatz um Grächtigkeit bemüehed,  
d'Gwalt, wo mit derä Jagd än Zämehang hät,  
verdränged und nöd wänd wahrha,  
det, wo mir losschicked, det, wo mir gschickt werdet.

Finde mir also uf äm Wäg vo dä Jagd d'Gerechtigkeit?  
Müesstet mir vielleicht zrughaltender, demüetiger si  
und zerscht öisi eigni Gwaltbereitschaft  
im Jage nach Gerechtigkeit wahrnäh?  
Üs gar beträffe lah vo derä Gwalt?

Gönd uf d'Jagd nach Gerechtigkeit  
Was isch für üs abbracht?

Für üs, wo in Sicherheit läbt,  
wo mängsmal wiit entfernt sind,  
vo Situationen und Frage,  
wos um existentielli Frage vo Gerechtigkeit gaht.

Vielleicht isch äs für üs nöd Ziiit z'jage nach Gerechtigkeit,  
sondern stahzblibä und z'süfzge  
und erscht rächt z'bitte - wie dä König Salomo Gott bittet:  
*gib uns ein hörendes Herz*  
schenk üs äs Herz, wo cha lose.  
Amen